

Lucifer se aanslag op die Dogter van Sion

Gedurende Augustus 2004 kry ek 'n benoude oproep vanaf 'n Amerikaanse lughawe af. Linda Newkirk is besig om te vlug. Sy beweer die CIA jag haar en wil haar doodmaak. Kan sy Suid-Afrika toe kom, want sy het nêrens op aarde waarheen sy kan gaan nie. Nou ja, ons het toe sowat 'n jaar gelede 'n skriftelike Gelofte aan ons Vader gemaak dat ons ons huis sal beskikbaar stel vir Sy kinders. Ek het geen keuse gehad nie, ons het dadelik geld ingesamel en haar kaartjie betaal. Op 13 Augustus kom sy toe hier in Suid-Afrika aan, en dit word toe die stormagtigste 50 dae van my en Dogter van Sion se lewe. Alles en almal berei voor op haar koms, die rooi tapyt word letterlik vir haar oopgesprei. Honderde mense besoek die Dogter van Sion gedurende hierdie tyd. Sy sien daaglik tot 7 groepe waarvoor gebid word. Ek is getuie van wonderbaarlike bekerings, demone wat uitgedryf was, mense wat genees was en vele ander wonderlike dinge. Maar, helaas, tussen al die wonderwerke, kom die dodelike gif van Satan ook toe deur en weereens is dit die hoogmoed wat sy tol kom eis. As Ms Newkirk iets wou hê, en dit word nie vinnig genoeg na haar sin gegee nie, kom daar kort daarna 'n hemelse boodskap en dit in die vorm van; "So spreek JaHWeH", en dan doen ons dit, sonder om vrae te vra.

So het sy dan ook alle teenstand weggee, so het sy 'n Trust laat opstel waarin sy die hoofaandeelhouer sou wees, want sê sy, in God se orde is die profete heel bo, dan die apostels, dan die herders en evangeliste. So het sy byna die hele plaas begin beheer, en as iets drasties nie gebeur het nie, sou sy dit ook nog onder ons uitgehad het. Tesame met 'n Nasionale Intelligensie persoon van Krugersdorp knoei hulle amper die titelakte van hierdie grond onder my uit. Maar prys ons wonderlike Vader, Hy was nog steeds in beheer, en het net verlang dat ons liefde onder mekaar moes gehad het, want dit was met hierdie onderlinge liefde, wat hierdie valse insypelaar verslaan is.

Die dodelikste ding wat sy gedoen het, was om aan mense titels en range te gee, en gemaak het of dit JaHWeH Self was wat dit gedoen het. Hierdie vrou was ongelooflik begaaf met 'n intellek wat vir niks geskrik het nie. Later sou ek uitvind dat sy een van slegs drie mense in Amerika was, wat die hoogste onderskeidings ooit in sielkunde behaal het. Sy het die vermoë gehad om verskillende gesprekke gelyk te monitor, en uit haar waarnemings het sy mense as apostels, herders, evangeliste en profete geïdentifiseer. Die titels was dan later onder gebed, waar sy voorgegee het dat sy die Vader self raadpleeg, deurgegee aan die mense. Die mense, en daar was sowat 300 van hulle, was so aangedaan en geraak deur hierdie vrou, dat ons werklik geglo het in ons roepings.

Vandag weet ek, dat ons almal, deur hierdie boeke van haar te lees het, onself deur haar gees vervul het, en dat hierdie selfde gees ons bedwelms het. Hier was dit die klassieke geval van gees-oordraging, net soos wat mens dit in valse kerke vind, waar elkeen in die kerk met dieselfde gees beset raak. Die gevolg was dat ryker mense wat geld gehad het, ook die beste titels weggeraap het. As jy haar gunsteling was, het jy profeet of apostel geword. As jy in haar slegte boekies was, word jy stoorman op die plaas of jy moet met die diere werk! So het daar toe onder mekaar 'n rangorde ontstaan. Apostels het hulle beter geag as ander, profete het feitlik mag van lewe en dood gehad, want een van die profete het sulke lang drome gehad, dat een nagskof te kort was vir alles wat hy opgedroom het. Manipulasie en beheer was aan die orde van die dag. Mense wat nie hulle titels en poste kon verwerk nie, het afgunstig en hoogmoedig op hul medebroers en -susters geword.

Ek het nou hierdie fase van die geskiedenis van die Dogter van Sion redelik in detail geskets, want elkeen van ons moet gedurig op ons hoede wees teen dieselfde soort van magsbeheer oor ons lewens. Die ironie is dat die meeste mense wat vandag nog so lekker lag oor die petalje van die Dogter van Sion en hierdie verleidster, sit self nog net so diep in hul eie verleiding vas. Vandag is daar vele vingerwysendes, wat almal self teenwoordig was, wat gerieflik vergeet hoe lekker dit was om die groot apostel of profeet van Linda Newkirk te wees. Wat wel gebeur het met die opregte mense op die plaas, was dat ons mekaar baie beter leer ken het, en naasteliefde het werklik gedy onder mekaar. Mense was baie behulpsaam en ondersteunend.

Op 'n dag besluit 'n groep om vir Judith de Beer in Ottoshoop te gaan kuier, en hulle neem vir Ms Newkirk saam. Hulle was sowat 20 wat van Dogter van Sion gereis het met 'n Unimog. Hier bars die bom toe letterlik. Judith sien toe deur hierdie vrou se manipulasie en die gort was behoorlik gaar. 'n Broer, eienaar van die Unimog, en Ms Newkirk bots toe trompop en met die eersvolgende vergadering op die plaas trek Ms Newkirk in 'n vreeslike tirade teen my en Dogter van Sion los. Sy bid en skreeu dat die spoeg spat. Dis asof sy letterlik mal geword het. Toe is al die mooi woordjies en die kamma-liefde verby. Sy was teengegaan, ek het hulle kant gekies en dit was onvergeefbaar. God se "alleen-bruid" duld dit toe nie. Hier manifesteer sy toe as dit wat sy altyd was, naamlik 'n gemaskerde Jesébel-gees. Die mooi kleed van 'n engel van die lig val toe af en onder dit kom die vieslike kleed van boosheid toe te voorskyn, die kleed van onvergewensgesindheid, hoogmoed, heerssug en onbeheerste woede. Satana (satan se vroulike gees) staan toe in haar volle glorie voor ons, en spoeg soos 'n groen mamba.

Van hier af is sy toe vort na Springs, en die skille begin toe van ons oë afval. Een vir een kom ons almal uit ons beswying uit. Mense, dit was erg, en ek kan nou nog presies voel hoe erg dit was, die verslaentheid, die leegheid en die vernedering wat 'n mens gevoel het oor hierdie groot verleentheid waarin jy jou volk laat beland het. Veral ek was verpletter. Ons, die uitverkose Dogter van Sion, met God se uitverkose bruid was dan op pad om die koninkryk op te rig! Nou sien ons dat dit alles 'n versinsel en misleiding van Lucifer was. Vandag weet ek dat net die liefde onder mekaar ons gered het, en dat dit die alleenlike faktor was waarmee ons Liewe Vader ons oë oopgemaak het. Die liefdesband onder mekaar kon sy nie gebreek kry nie. Soos een man het ons saamgestaan, die oorblywende boeke verbrand en elke teken van haar bestaan by ons uitgewis. Baie skade was gedoen, en nie 'n bietjie aan die menslike ego's nie. Ons by die Dogter van Sion sou weer van voor af moes begin. Vandag dank ek ons Abba Vader vir hierdie toets waardeur ons moes gaan. Dit het baie van ons verdeemoedig. Ook weet ek vandag dat Lucifer nie verniet een van sy bestes gaan haal het in Arkansas in Amerika om haar na hierdie klein plasie in Suid-Afrika te laat kom nie. Vanaf hierdie einste plek sou nog meer wonderwerke plaasvind met betrekking tot die toekomstige planne van ons Hemelse Vader vir Sy Sionsvolk.

Dadelik het ons met hernieuwe ywer voortgegaan met die vertalings van die Groot Johannes Evangelie van Jakob Lorber, wat ons toe al byna vir een jaar nagelaat het. Hierdie boeke van ons Meester JaHshua was waarlik ons redding gewees, want dit was daarmee wat ons kon staande bly teen Lucifer se gesant. Hiermee het die 16de Desember 2004 ook nou aangebreek en ons het ons gereedgemaak vir die Geloftevieringe op Kameeldrif.

2004, - Die Sionshuis beweeg in 'n volgende fase in

Die tyd voor die fees was weer gekenmerk deur uitsprake vol bravade van Genl Opperman, dat die Dogter van Sion nog steeds onwelkom was op Bloedrivier en dat ons summier gearresteer sou word, sou ons dit waag om ons gelofte op die terrein te betaal. Ons het toe ons Geloftefees ter plaatse gehou, met 'n heerlike braai daarna onder die reeds genoemde **eikeboom**. Onwetend aan ons, word 'n vrou, Susan Oosthuizen, hier onder hierdie boom, waar nou al twee klipstapels as getuienisse gelê het, opdrag deur Vader gegee om 'n blaas van hierdie spesifieke boom te pluk en dit in haar Boek van Herinnering te plaas. Sy doen toe so en vergeet toe daarvan vir een volle jaar. Hierdie daaropvolgende jaar was gekenmerk deur die vertaling van ander Duitse profete se boeke, onder andere Bertha Dudde, Mayenhofer en Engels se boeke. Die Dogter van Sion het gefloreer op die nuwe eerstelingsbrode en die vars wyn. Daar het 'n merkbare vordering en groei begin plaasvind in die mense wat nie van die Dogter van Sion

weggegaan het nie. Elkeen wat ernstig na ons Verlosser gesoek het, se geestelike lewe het verinnig. Ongelukkig het talle mense, na die Linda Newkirk debakel, alles voor my deur gegooi, en die pad gevat. Ook het hulle die Brood van die Lewe, naamlik die woord van ons Verlosser aan Jakob Lorber ook verwerp en teruggeval na die ou Bybel. Sommige het darem nog hul Boek van Herinnering behou.

Dogter van Sion het nog steeds voortgegaan met die daaglikse offer van skriflesing, sang en gebed, soos belowe aan ons Vader op die Bloedrivier-terrein in 2001. Verder het ons werklik begin om die koninkryk met geweld na ons toe te trek en aktief begin om huisies te bou op die plaas en blanke boemelaars, alkoholiste, dwelmslawe en werkloses te huisves. Daar is begin om hulle te probeer verlos deur ernstig te bid en te pleit vir verlossing. Ook is sopkombuise in Pretoria begin en ondersteun. Hierdie jaar het blitsvinnig omgegaan en gou was ons weer aan die vooraand van die Geloftefees van 2005.

Hier moet gemeld word dat die Dogter van Sion elke Geloftefees vanaf 1998 as volg gehou het:

7 Dae voor die tyd is die Gelofte vir 7 opeenvolgende dae gelees met die finale lees op 16 Desember. Daarom, toe ons in 2004 die Gelofte op 16 Desember gelees het, was dit die 49ste keer wat dit gelees was. Beide Geloftes is gelees en bevestig, naamlik die 1838 Gelofte, sowel as die Dogter van Sion Gelofte. Omdat 49 'n 7x7 is of 'n sewe keer gelofte, sewe maal herbevestig, was dit logies dat ons onderneming ten opsigte van die huis te Bloedrivier een of ander voltooiingsstadium moes bereik. U moet herinner word dat die Hebreeuse woord vir sewe is "*Shaba*" wat beteken "*om iets met 'n onverbreekbare eed te bevestig*". As iets dus gesewe word, word iets dus "*geshaba*" en as iets ge-nege-en-veertig word, is dit sewe maal "*geshaba*".

Onwetend vir ons, was die eikeblaar wat Susan gepluk het, die Hemelse Vader se teken dat Hy hierdie Gelofte-aanbieding aanvaar het. Ons was egter salig onbewus daarvan, want Susan Oosthuizen was nooit betrokke met die Dogter van Sion se vorige aanbiedings te Bloedrivier nie. Ons liewe Vader het dit juis so gewil, dat daar nie later gesê kon word dat die Dogter van Sion die hele ding so bewimpel of gekook het nie.